

Minister Michelle Hooyboer-Winklaar ta anuncia **Renobacion y expansion di Colegio San Nicolas ta cuminsa otro siman**

OTRO siman trabounan di renobacion y construcion lo cuminsa na scol Colegio San Nicolas. Esaki un proyecto cu tin basta tempo caba den proceso, y cu otro siman lo cuminsa ehecuto. Dialuna awo e contratista Freman N.V., DOW, e directiva di scol y demas partner lo sinta hunto pa determina con lo organisa e

trabou di forma cu e operacion di e scol por sigui cana normal. Colegio San Nicolas cual antes tabata cay bou di SMOA, pero desde aña escolar 2012/2013 ta cay bou di DPS, e departamento cu ta maneha scolnan publico. E scol a cuminsa cu un cantidad chikito di alumno pero awo a bira uno di mas cu 500 estudiante pa aña

escolar, cu consecuencia cu a crea un scarsedad na lokaal. Hunto cu tur 'stakeholders' a sinta pa lunanan largo na mesa pa sigura cu ta tuma e decisionnan corecto na bienestar di e futuro di e scol.

E renobacion lo wordo ehecuto den diferente fase teniendo na cuenta cu ainda les lo mester sigui mientras cu e renobacion ta tumando luga. Den e prome fase lo bay haci un ampliacion di e camber di maestronan, cual actualmente no ta apto pa e cantidad di docente cu tin na Colegio San Nicolas. Tambe lo traha 3 oficina nobo cu lo bira un segundo piso nobo. Den e prome fase aki tambe e scol lo ricibi un lokaal extra cu lo yuda alivia e parti di



scarsedad di klas.

Manera cu caba e prome fase lo bay over na e siguiente fase cu ta e renobacion completo di Arubanita como tambe e cura di ful e scol. Esaki pa drecha e nivel di seguridad pa e estudiante y docentenan. Den total tin 5 fase di renobacion y ampliacion cu ta forma parti di e plan di renobacion pa Colegio San Nicolas.

Asina cu determina con lo organisa e proceso di trabou, Colegio San Nicolas lo informa e personal di scol, como tambe e mayornan y alumnonan tocante e trabounan, y implicacionnan di e prome fase di trabou. Ministerio di Enseñansa hunto cu DPS y rectorado a palabra cu lo bin encuentronan pa personal y mayornan cu informacion di

e plan di renobacion completo asina cu tur detaye ta cla.

Desde cu mi a tuma e cartera di enseñansa, Colegio San Nicolas a conta cu mi sosten y apoyo.

E atencion cu mi team tin pa sigura cu tur cos cana bon na e scol aki ta inmenso y esey lo no cambia te dia e scol ta completamente renoba y cu tur aspecto ta poni na nan luga pa brinda un bon operacion di e scol, asina Minister Michelle Hooyboer-Winklaar a declara.

"Nos no ta cla, ainda tin reunionnan tumando luga pero mi tin tur confianza cu e persona y departamentonan encarga cu e proyecto pa cu Colegio San Nicolas ta comparti e vision na bienestar pa un y tur den e scol", di acuerdo cu e mandatario.

